

Leonard Croes, participante Grupo #6 Formacion Social:

“Tur cos den bida ta duro, pero si bo kier logra algo, bin akinan. Esaki ta echt hopi bon; bon pa bo mes!”



ORANJESTAD (AAN): Di un manera masha simpel, pero sincero, e hoben Leonard Croes ta conta di su experiencia despues di a subi Seroe Cristal y participa den un simulacro como parti di su entrenamiento militar den Formacion Social. ‘Loke no ta mata bo, ta haci bo mas fuerte den futuro y p’esey mi ta akinan,’ asina e mucha homber di 18 aña ta reflexiona. E ta forma parti di Grupo #6 di e proyecto Sociaalvormings Traject. Ademá di a cana den Seroe Cristal pa prome biaha den su bida, Leonard tambe a conoce e experiencia di carga ekipo, arma tent, drumi anochi den mondi y tuma warda pa wak cu no tin enemigo cerca. Tambe e lidernan di Kazerne cu ta encarga cu e grupo a pone un escenario caminda supuestamente un colega a wordo tira y nan mester a carga cune y hib’e lihe pa e ricibi tratamiento medico. Tur esaki a laga e hobennan sin

rosea, pero yen di adrenalina. Den e caso di Leonard, el a tende di e programa Formacion Social for di un amigo cu tambe tabata aden



y a cont’e di con bon e ta. ‘Mi no tin scol y mi kier a purb’e,’ el a bisa. El a papia cu su tata y esaki a yude busca informacion y formulario na e oficina di SVT situa na Marinierskazerne na Savaneta cerca e coordinador general,

Jessy Ras.

E ta corda cu tur cos a bay bon y nan yam’e pa bin haci test. Despues di esey mester a warda atrobe y durante e tempo ey, Leonard a bisa cu e tabata resa pa nan yam’e. Ora e noticia di su aceptacion a drenta, tabata un momento masha grandi pa e hoben. ‘Ora nan a yama mi; ora nan a bisa mi cu mi a drenta, mi no ta corda nada mas paso mi tabata asina contento.’ Asina el a cuminsa su trayecto dia 18 di augustus ultimo hunto cu 23 otro hoben. Den e programa, e ta ricibi tur loke e tin mester. Asina mes, tin algun hoben cu a dicidi di tira e serbete abou. Leonard por compronde, pero afortunadamente, e mes ta determina pa sigui. ‘E ta basta duro, pero pa loke bo a bin e ta bon paso ora bo bay bek, nan lo ta orguyoso di bo,’ e ta bisa refiriendo na su famia, chick y amigonan. Den apenas tres siman, Leonard ta wak su superior,



entre nan, Lieutenant Henriquez, Sergeant Dijkhoff y Corporaal Texeira y Werleman, figuranan cu e ta respeta y confia. ‘Nan ta yuda bo pa bo mesun bon. Nan ta siña bo traha cu bo mente y djis keda bay duro y wanta paso tur cuminsamento tin su fin,’ e hoben ta comenta. Pa loke ta trata esnan cu ainda ta aden, pero ta duda si nan tin e forsa pa caba, Leonard ta conta cu tur e muchanan ta apoya y motiva otro. ‘Nos ta purba haci tur cos pa e keda den e grupo paso bo no ta bin akinan por nada; bo ta bin pa un motibo. Nos ta keda motiv’e pero toch ta su decision na ultimo.’ E si ta trahando caba su plannan pa futuro, despues cu e caba cu Formacion Social. Entre otro e kier bay scol bek, busca un bon trabou y haci cosnan miho den bida. Tur esaki motiva pa loke el a

siña apenas den e prome parti di e trayecto di Formacion Social. ‘Esey nos a siña aki, traha cu respet y uza bo cabes; trahando den team tur cos ta bay,’ el a bisa. Finalmente e ta conseha tur otro hoben ey’fo cu ta pensando of cu ta den un situacion similar na esun di dje, pa tuma e decision y busca pa drenta den Formacion Social. ‘Tur cos den bida ta duro, pero si bo kier logra algo, bin akinan. Esaki ta echt hopi bon; bon pa bo mes!’ E ta gradici su famia y su chick cu a para tras di su decision. ‘Ami mes kier a bin, pero mi famia ta yuda mi,’ Leonard ta conta. Tambe e ta yama danki na Gobierno y oficina di SVT pa e chens cu el a haya. ‘E ta un bon chens pa mi futuro paso mi no tabatin nada. Si no ta pa nan, lo mi ta riba caya ainda sin nada.’